

«In bab da l'Europa»

Glisch nova sin Carl il grond († 814)

DA GUIU SOBIELA-CAANITZ

■ La Quotidiana ha gis puntuà plis buns argumaints che stimuleschan d'emprender latin. In dals pli gronds promoturs da lez linguatgs l'ha sfurzà tras sco caracteristica culturala avant dudesch seculs en in vast imperi che tanscheva da Spoleto/Umbria a Boulogne-sur-Mer, da Barcelona a Bremen, da Bordeaux/Aquitania a Regensburg/Baviera e da l'Anjou a l'Istria. Quel um, Carl il grond (*747 u 748), retg dals Francos davent da 768 e dals Langobards davent da 774, è vegni encurunà dal 800 «imperator Romanum gubernans imperium». Gist sco germanofon metteval il pli grond pais sin in studi e diever correct da latin per coliar spiertalmain ils pievets da ses imperi.

Patria istorica da plis pievels

Ins na sa betg scriver l'istoria da noss continent senza resguardar Carl il grond. L'antierur cuss. naz. turitgais Erwin Jaekle (1909–1997) ha rapportà d'ina delegaziun da tuttas partidas politicas catalanas tar las autoritads europeicas de Bruxelles e Strassburg per l'adesiun da la Spagna a las cuminanzas: «Avant las tractativas èni ids ensemes ad Aachen per urar en il dom da Carl il grond. I resguardavan quai sco natiral, perquai che l'Europa per els n'era berg mo ina fiera gronda u ina birocrazia internaziunala, mabain la patria istorica nua ch'i turnavan (...). Lur schientscha istorica superava anc las barrieras tranter partidas ed als marcava tuts» (1). Lez monarc ha vairamain fundà la Catalogna. Gia 785 ha la glieud da Girona surdà libramain la citad al retg franco; quai han fatg lur er avants da valladas catalanas en las Pireneas. 801 ha in'armada franco conquistà Barcelona. Ils avants perencunter, malgrà lur cretta cristiana e lur dialect catalan tempriv, «han sustegnì la schuldada islamica tar il cumbat cumiuvel cunter ils Francos. Pir a la fin, cur che la mancanza da mangiativas periclitava lur vitas, hani resignà, abandonà la garnischun e surdà la citad. Quai hani dentant fatg pir cun la garanzia ch'ils Francos schanegian lur possess, leschas ed autoritads localas (...). Perquai ha l'imperatur fatg [tuttina] concessius generus als Barcelonais» (2). El ha nominà cont da la citad il figl d'ina cristiana spagnola. Il contadi da Barcelona è stà la tgina da la Catalogna, e l'imperi da Carl la patria istorica da plis auters pievels. Ma co è Carl vegni adaquella da stgaffir e guvernlar in imperi che sa referiva explicitamain a quel da la Roma antica? La «Wissenschaftliche Buchgesellschaft» (Darm-

stadt) ha incumbensà la medievista scozaisa Rosamond McKitterick (Universitat da Cambridge), commembra da l'Academia austriaca da scienzas, d'elavurar ina biografia da Carl il grond sco fundatur e regent d'in imperi europeic da pliras culturas; la chasa editura ha lura translatà e publitgà lezza lavur. Ils mars, culms, flums e lais che l'imperatur enconuscheva datti er oz, e Saint-Denis è anc adina sper la Seine, Orléans sper la Loire e Pavia sper il flum Tessin. Ma la biografa analisescha in'ideologia politica fitg differenta da la nostra: Gist quai fascinescha ed embarassa enina.

L'allianza francoa cun quatter papas

Il giuven retg Carl, sco figl d'in putschist, ha l'emprim stuà francar sia legitimidad. Ses bab Pippin († 768), primminister franco e figl dal primminister e general franco Carl «il martè» († 741), aveva desitui 751 ses retg, cun l'agid da blers magnats e cunzunt da papa Zacarias († 752). Papa Stefan II († 757) ha fatg visita 754 a Pippin e s'allia cun el cunter il reginam langobard; el ha benedi solennamain il nov retg franco e ses figl Carl en la baselia da Saint-Denis. Papa Adrian († 795) ha renovà l'allianza francoa; sin ses «giavischs adina pli insitents» (p. 106) è retg Carl 774 penetrà en l'Italia cun sia armada ed ha conquistà la chapitala Pavia nua ch'ins l'ha encurunà retg dals Langobards. Roma saveva sa fidar dal sostegn franco; ma papa Liun III († 816) aveva inimis er a Roma: «Quests l'han assagli, empruvond d'al chavar or ils egls e d'al stgarpar or la lieunga. El è fugì sur las Alps tar retg Carl a Paderborn [en Vestfalia] per survegnir agid (...). Mess francoe e lura Carl sezò en ids a Roma per s'occupar cun ils adversaris da Liun; (...) quest, da Nodal 800, ha encurunà Carl sco imperatur en la baselia da s. Pieder (...). Il status dal regent ha pia survegnì in nov senn ideologic (...) areguard l'autoritat teoretica e la referencia ad anteriurs imperaturs cristians romans sco models» (pp. 110–111). Carl leva vairamain «stgaffir in sistem statal cristian coerent en il rom d'in'expansiun rasanta» (p. 325). In da ses regulativs «cuntegna bleras decisius da detagl (...) davart la conduita ed il depurament dal clerus, las pretaisas per la creaziun da scolas, ils duairs dals spirituals, l'observaziun da las reglas monasticas, il chant roman en ils cults divins, il diever da paisas e mesiras identicas e correctas (...). Il prolog punctuescha il svilup conscient d'ina politica e d'ina visiun per in reginam franco cristian» (p. 212). Carl ha plinavant promovì l'ortodoxia catolica davart las iconas, formulada da l'uestg

d'Orléans encunter la Baselgia orientala da Constantinopel: «Il tractat «Opus Karoli regis» (...) ha confermà il parairi ch'ils maletgs sajan mo memorias da quai ch'i represchentan. Ins ha cunzunt punctuà la superioridad da la scrittura e dals texts areguard maletgs per instruir ductrina (...). Lezza stima da quai che stettia scrit corrisponda tutfafatg ad auters aspects da la politica da Carl» (p. 271).

Otg innis biblics per latin

Il retg franco era in catolic cartent e devozius tenor las normas da lezza giada. «L'entir tun da sia renomada brev a [sia dunna] Fastrada (...) e las externaziuns dals documents ch'el relaschava cumprovan la pietusadat personala da Carl, sco era ses encletg dals duairs religius» (p. 284). La Biblioteca naziunala austriaca (Vienna) posseda in psalter latin (cod. 1861) elavurà sin incumbensa da Carl encunter la fin da l'otgavel tschientaner, cun «ina rimnada da credos e da commentaris (...). Lez psalter conferma il respect per las tradiziuns liturgicas da la baselia tempriua cun la schelta or dal Veder e Nov Testament dals innis che cumpognan ils psalms» (p. 288). I vala la paina d'enumerar quels otg innis or dal canon biblic, cun ils incipits tenor la traducziun da s. Gironas (Hieronymus, † 420; «Lo» munta «Lucas»): «Confitebor tibi» (Jesaja 12, 1–6), «Ego dixi in dimidio» (Ezequiel 38, 10–20), «Exultavit cor meum» (1 Samuel 2, 1–10), «Cantemus domino» (Exodus 15, 1–19), «Domine audivi» (Habacuc 3, 2–19), «Audite coeli» (Deuteronom 32, 1–43), «Benedictus dominus» (Lc 1, 68–79), «Magnificat» (Lc 1, 46–55) e «Nunc dimittis» (Lc 2, 29–32). Per la liturgia valeva mo il latin, ma ins posseda anc traducziuns tudestgas elavuradas en il novavel tschientaner tempriu per instruir ductrina, numnadama in «babnoss, credos, catechissem da battan, 'Regla da s. Benedetg', evangeli da Matteus (...) e pliras uraziuns e furmlas magicas (...). In manuscrit (...) cuntegna il 'Catechismus da Weissenburg' [en l'Alsazia] en el dialect franco renan dal sid; el cumpiglia er il babnoss per latin, cun commentari tudestg, e la glista latina e tudestga dals 'putgads mortals» (pp. 274–275). La biografa numna otg lieus principals, t. a. Son Gagl e Weissenburg, nua ch'ins translatava texts en tudestg; lezs otg lieus tigiravan era l'erudiziun latina. 813 ha in decret recumandà al clerus da translatar per il pievel «in rusticam Romanam linguam aut Thiotiscam» (cità p. 274), pia en dialect neolatin u german. L'imperi carolingic cumpigliava er intschess bascs e cunzunt slovens, ma ins na posseda nagin text da

lezza giada en lur linguatgs. Ils pajais celts èn restads ordaifer l'imperi.

Tgirar il linguatg standard

Dal 784 ha Carl trames ina circulara a tuttas claustras e tutts uestg da ses dominis: «Mintga claustra e mintga uestg duai deditgar sias fadias a studegiar litteratura ed a l'instruir a tgi che Dieu haja dà il talent d'emprender (...). Per l'incumbensa da meglierar la fumazion, duais tscherner umens cun la voluntad ed il dun d'emprender e cun la brama d'instruir auters» (cità p. 273). Il retg ha confermà quellas directivas cun sia «Admonitio generalis» da 789: «Hajat quità da crear scolas nua ch'ils giuvens emprendian a leger! Curregi cun premura ils psalms, las notas, il chant liturgic, il chalender, la grammatica en mintga claustra ed uestgieu!» (cità p. 274). L'autura commentescha: «Linguatg latin e cretta cristiana faschevan part da l'ierta franco (...). La cristianisaziun dals intschess a dretga dal Rain è ida svelt. En quels nua ch'ins na duvrava anc betg il latin, l'han ils Francos introduciù en la regenza e la vita giuridica, sco er en l'educaziun e la religiun (...). El è vegni il principal linguatg uffizial (...). Ils sciensiads carolingics han midà sapientivamain l'ortografia e la structura dal latin duvrà. Già en il davos decenni da l'otgavel tschientaner han ins entschavi ad adattar dapli il linguatg da scrittura a las normas classicas (...). Ins ha dauzà il latin, cun sia forza simbolica ed istorica, fin al stgalim suprem. Per communigar, maiindir per avanzar en la vita politica e religiusa, èsi vegni ina premissa imperativa d'enconuscher a fund il latin (...). Tgi che possedeva e tgirava l'abilitad da scriver mussava ch'el fascheva part dal mund franco sco che Carl l'aveva schlar-già marcantamain. En in imperi nua ch'ins duvrava linguatgs neolatins e germans ha lezza promozion dal latin e dals texts scrits marçà profundamain il svilup d'in'identitat culturala franco (...). Il vehichel latin ha manà ils Francos a s'identifitgar a fund cun il passà roman; quest è vegni per uschedir lur agen passà (...). Ils texts latins da l'antica e dal cristianissem tempriv èn vegnidis parts da lur ierta spiertala (pp. 274–277).

Sfurzà si il batten als Saxons

Il reginam cristian dals Francos n'ha betg adina missiunà. Carl ha s'allia cun Slavs pajans e cun stadis islamicis. Tant pli prend'ins stgandell da la rigurusa e brutalta cristianisaziun che Carl ha sfurzà si als Saxons da las actualas Vestfalia e Saxonie basa. È lez tema tabu? Jaekle al taschenta en sia «Idee Europa». Rosamond McKitterick al menziuna, ma sias externaziuns na cun-

tentan betg. Ella rapporta tuttina: «L'emprima fasa da la guerra ha culminà en la greva disfatga d'in'armada francoa 782 (...) e, sco crudaivla repressalia, la stgavazada da 4500 Saxons (...). In decret (...) ha stipulà cun insistenza ch'ils Saxons duajan survegnir il batten sur smanatscha da la paina da mort (...). Ins ha deportà blers Saxons en Baviera, umens, femnas ed uffants» (pp. 101–102). Co san ins declerar tut quai? Pli clera è in' altra biografia da Carl (4) scritta a la fin dal tschientaner passà dal medievist Alessandro Barbero (Universitat dal Piemont oriental): «Suenter 782 ha Carl fatg guerra cun ina crudaivladad mайдудида, devastond la regiun per fomentar ils rebels. Per l'emprima giada ha'l envernà personalmain en il pajais d'in inimi. A medem temp ha'l relaschà la pli crudaivla da tut sias leschas, l'uscheditg 'Capitulare de partibus Saxonie', il qual impona la paina da mort a tgi ch'i offendia il cristianissem e ses spirituals (...) e schizunt tralaschia la gigina dal venderdi (...). Il decret era uschè rigurus che schizunt confidents dal retg l'han crititg (...). Igli ha sa mussà ch'il batten sfurzà si gidava pauc. L'autoritat francoa supprimeva mintga return tar celebraziuns pajaunas cun ina crudaivladad extrema; quai ha chaschunà ina nova insurrezioni generala en il nord da l'intschess saxon. Carl ha lura sa mussà anc pli crudaivel; (...) el ha schizunt deportà en massa las populaziuns rebellitas» (pp. 51–52). Ma Barbero punctuescha ch'il retg haja a medem temp «segirà la collavuraziun da la noblezza saxon (...). Il simbol da questa integraciun è stà la citad nova ch'el ha creà a Paderborn (...). L'emprima uestg da Paderborn è stà in Saxon» (p. 53). Gist il medievist piemuntai, malgrà sia critica da la crudaivladad dal retg envers ils Saxons, fa ina bilantscha positiva da ses 46 onns da regenza; el citescha (p. 5) quest giudizi da Lucien Febvre (1878–1956), naschi in Lorena, istoricher da la reformaziun e da la Franche-Comté che ha mussà ils lioms tranter istoria e geografia: «L'imperi da Carl il grond ha dà ina furma per l'emprima giada a quai che nus numain Europa». Barbero, citond in poet anonim da 799 che numnava Carl «rex pater Europae», ha dà a sia biografia il suttitel: «Un padre dell'Europa».

1) Erwin Jaekle, *Die Idee Europa*. Frankfurt am Main (Propyläen, ISBN 3-549-06684-8) 1988, p. 386.

2) Josep M. Salrach, *El procés de formació nacional de Catalunya (segles VIII–IX)*. Tom 1: *El domini carolingi*. Barcelona (Edicions 62, ISBN 84-297-1368-9) 1978, pp. 25–26.

3) Rosamond McKitterick, *Karl der Große*. Darmstadt (Wissenschaftliche Buchgesellschaft, ISBN 978-3-534-14149-4) 2008.

4) Alessandro Barbero, *Carlo Magno. Roma e Bari* (Laterza, ISBN 88-420-6054-2) 2000.